

四庫全書

集部

欽定四庫全書

集部

陳白沙集卷五

詳校官庶吉士臣陳若霖

中書臣劉源溥覆勘

總校官檢討臣何思鈞

校對官中書臣高 中

謄錄監生臣康 傑

欽定四庫全書

陳白沙集卷五

明 陳獻章 撰

古詩

和楊龜山此日不再得韻

能飢謀藝稷冒寒思植桑少年負奇氣萬丈磨青蒼夢寐見古人慨然悲流光吾道有宗主千秋朱紫陽說敬不離口示我入德方義利分兩途析之極毫芒聖學信匪難要在用心臧善端日培養庶免物欲戕道德乃膏

腴文辭固粃糠俯仰天地間此身何昂藏胡能追軼駕  
但能漱餘芳持此木鑽系其如磐石剛中夜攬衣起沉  
吟獨徬徨聖途萬里餘髮短心苦長及此歲未暮驅車  
適康莊行遠必自邇育德貴含章邇來十六載滅迹聲  
利場閉門事探討蛻俗如驅羊隱几一室內兀兀同坐  
忘那知顛沛中此志竟莫強譬如濟巨川中道奪我航  
顧茲一身小所繫乃綱常樞紐在方寸操舍決存亡胡  
為謾役役斲喪良可傷願言各努力大海終回狂

答張內翰廷祥書括而成詩呈胡希仁提學

古人棄糟粕糟粕非真傳眇哉一勺水積累成大川亦  
有非積累源泉自涓涓至無有至動至近至神焉發用  
茲不窮緘藏極淵泉吾能握其機何必窺陳編學患不  
用心用心滋牽纏本虛形乃實立本貴自然戒慎與恐  
懼斯言未云偏後儒不省事差失毫釐間寄語了心人  
素琴本無絃

代簡答羅一峯殿元

臺城一揮袂忽忽星週五路永消息斷年深別離苦思  
君髮為白始白數莖許今晨對書尺白者不可數先生  
天下士詎肯顧衡宇悵望曹溪約獨與光也語

一峯約  
會南華

不至

贈張叔亨知縣

棲棲白沙舫影弄寒江月夫君沙陽令胡事顧微劣我  
祖在九冥願君為墓碣三夜茆簷下寒燈坐來減感子  
心意勤愧我言詞拙明發江上舟踟躕與君別

戲贈館賓

遲遲歲將暮戚戚懷故里館中飢鼠多旅食驢兒尾垂  
德於不報世間寧有此行李無一錢還家對妻子

冬夜

長夜氣始淒木棉被重裘端坐思古人寒燈耿悠悠是  
時病初間背汗仍未收學業坐妨奪田蕪廢鋤耰高堂  
有老親徧身無完紬丈夫庇四海而以俯仰憂口腹非所  
營水菽吾當求明旦理黃犢進我南岡舟

又

我從省事來過失恒十九喜怒朝屢遷言為夕多苟平  
生昧慎獨即事甘掣肘孔子萬世師天地共高厚顏淵  
稱庶幾好學古未有我才雖鹵莽服膺亦云久胡然弗  
自力萬化脫樞紐顏顏無復少此志還遂否歲月豈待  
人光陰隙中走念此不成眠晨星燦東牖

經鱷州

夕舫臨大波北風吹我席冥冥鱷州烟宛對君山碧來

雁知天寒歸人看月色超超塵外心浩矣周八極

厓山看大忠祠豎柱阻風七日後發舟用舊韻

青青竒石草上有牛羊躅沟沟厓門水遠帶湯瓶

山名綠

浮雲散孤嶼初日明村曲言歸輒風濤無乃疑張陸遲

遲重遲遲畏此波心木

漁人植長木於波間置罾俗呼為罾戙木觸之能覆舟

自策示諸生

賢聖久寂寞六籍無光輝元氣五百年一合又一離男  
兒生其間獨往安可辭邈哉舜與顏夢寐或見之其人

天下法其言萬世師顧予獨何人瞻望空爾為年馳力  
不與撫鏡歎以悲豈不在一生一生良遲遲今復不鞭  
策虛浪死勿疑請回白日駕魯陽戈正揮

湖西八景為羅修撰作

鼓一  
峰體

太極丸春

天城列兩儀其中位太極

山名

不悟名象生焉知畫前易

伏羲古已亡圖書久晦蝕寄語山中人妙契在端默

翠玄洞天

翠玄在何許乃在金鼇麓石門俯深幽來者秉明燭繡  
壁誰可緣丹房我當宿呼童烹金鼇膏此千丈木

一峯來秀

西湖有一峯天地得撐拄旁有龍塘峽北有浮香塢我  
行崑崙丘一望一延佇歸來二三子抵掌太極語

三峽迴清

一峽蟠一龍羣山莽回互武夷雖九曲三峽誰勝負澄  
澄水上月歷歷谷中樹焉得千丈筇坐弄潺湲處

金鰲霽雪

一鰲海上來頭戴雪花白諸鰲起相拒千秋歸不得仙人羅一峯永戲金鰲側借問別離時西佛生彌勒

玉冕晴雲

玉冕臣諸峯左右羅絡之雲來巾其顛得雨不復疑豈無澤物功雲覆在何時悵望百穀春廣濟蒼生飢

飛輦橫翠

我昔遊太空太空雲冥冥歸來控翠蚪力與金鰲爭巍

巍太極尊揮置東西行如何千載下空儼飛輦名

大流垂玉

大流無此奇偶置銀河傾願回銀河流免與世濁并一  
洗日月光再洗天地清何止天地清萬世無甲兵

題冷庵

江西食憲  
陳琦自號

舉世好近熱子獨畏之猛投身向壑雪永謝白日影玉  
壺貯清永秋露滴金井是以冷自勝于世非絕屏假令  
務絕屏過與近熱等我以道眼觀天下方首肯寒暑兩

推移正中太和境寄語庵中人不熱亦不冷

扶南訪黃巖尹廊載道適來顧白沙兩不值賦三

側韻

行舟石門浪不識扶溪口時時聞來往日入喪水手昨  
暮黃巖馬來嘶白沙柳惜哉兩不過獨坐空搔首

我有一斗酒願與子秉燭子來復空去值我不在屋稱  
子呼不至踉蹌走入竹明旦歸我艇先後迺以告

閒居不擬出偶出負佳客問客來何許來自黃巖謫長

安接笑語中道有睽隔悠悠百年內與子異顯默

感事

君心如逝水一往不復旋誰能萬里浪安坐駕此舩傷  
哉一何愚由我不由天仁者固有矜智士乃自全

夢觀化書六字壁間曰造物一場變化

孔子曳杖歌逍遙夢化後我夢已逍遙六字書在牖聖  
愚各有盡觀化一遭走問我年幾何春秋四十九死生  
若晝夜當速何必久即死無所憐乾坤一芻狗

貪泉

藜藿可養生  
栢棺可送死  
瓦礫是黃金  
貪泉亦清泚  
飲水心不易  
豈獨夷齊爾  
山鬼笑儂家  
儂家笑山鬼

九日諸友會飲白沙得雁字

黃菊有佳辰  
良朋樂呼喚  
爭持淵明杯  
來接子桑飯  
落葉迎馬鞭  
斜暉轉沙岸  
雨聲靜秋竹  
池影入江雁  
酒酣獨高歌  
呼兒續我斷  
諸君極留戀  
十觴亦不算  
雖無孟嘉量  
且免落帽亂  
百年能幾何  
去者已強半  
來會安可

期細把茱萸看

贈林汝和通判

在昔黃金臺與子初周旋萍蓬忽相失不見垂十年昔  
為禮曹官今搖慶陽鞭常聞太華峯峻絕峙中天雅志  
在登陟矯如孤鵠騫適來南海旁問訊滄洲塵語舊未  
終日棲棲有所牽丈夫重出處富貴如浮烟行則為在  
田止則為在淵勞勞夫何為贈子千金言

贈馬龍如湖西奠一峯先生

晨興坐捫虱有客窺我床客來問何許顏色慘不光去  
歲秋在季文星墜西江而師羅一峯幸視我弟兄相見  
不得語失聲淚滂滂子行詣湖西問訊我有將夙昔夢  
見之恍若芙蓉城覺來索苦句句就涕未停何以告一  
峯寄意於辦香索火化奠文一峯其洋洋我病久南海  
欲往未得行送子出門去目極秋天長

贈陳秉常

遠色霽初景清風振遙林子來入我室弄我花間琴正

聲一何長幽思亦已深願留一千歲贈子瑤池音

黍稷雜荏葦邪思亂正性人爲一鹵莽諉曰天之命白  
日朝出東須臾復西暝良時誠可惜逝矣悲莫競

大舜卷婁之莊周竟奚取人生貴識真勿作孟浪死誰  
能去中土儼舍朝鮮里白首金石交視我南川子

我否子亦否我然子亦然然否苟由我於子何有焉人  
生寄一世落葉風中旋胡爲不自返濁水迷清淵

藤蓑

一蓑費幾藤南岡礪朝斧交加落翠蔓制作類上古吾  
聞大澤濱羊裘動世祖何如六尺蓑滅蹟蘆花渚舉俗  
無與同天隨夢中語今夜不須歸前溪正風雨

人好蓑亦好月光水亦光水南有酒媪酒熟喚我嘗半  
酣獨速舞舞罷還舉觸所樂在知止百年安可忘

挽蓑欲何為新月出東嶺獨速舞不休凌亂何由整曠  
哉漆園吏自形還自影

新蓑藤葉青舊蓑藤葉白新故理則然胡為浪忻戚扁

舟西浦口坐望南山石東風吹新蓑浩蕩滄溟黑須臾  
月東上萬里天一碧安得同心人婆娑共今夕

朽生何所營東坐復西坐搔頭白髮少攤地青蓑破千  
卷萬卷書全功歸在我吾心內自得糟粕安用那

賽蘭

南有賽蘭香名花人未識光風散微馨甘露洗新碧一  
月薰蒸來氤氲在肝膈乃知方寸根中稟天地塞誰為  
續騷手俯仰空悽惻窓戶悄無人圖書共昕夕

天人之際

天人一理通感應良可畏千載隕石書春秋所以示客  
星犯帝座他夜因何事誰謂匹夫微而能動天地

答梅侍御見寄

羣龍盛朝野弱羽聊山林行春忽傾蓋對榻山花深引  
我一杯水寫君龍唇琴永言歌大篇風雅有遺音乃知  
鷹鷂氣未愜鸞鳳心王事有驅迫暮雨別江潯離情落  
晚趣再往三洲吟何以舒我懷青天盼遙岑

寄題三洲巖

我行蒼梧道息漿荒江湄連岡一以眺石室涵晚暉前  
哲有題字執炬往讀之遲回北壁下目擊元公遺今古  
一相感光風吹我衣虫鳴丹竈中葛仙胡不歸對之發  
長嘯宇宙今何時圓蟾夜罔罔蝙蝠秋飛飛願言托高  
棲行矣無是非

病中寫懷寄李九淵

出門見齋顏十日不一逢以我腹中滿憶君頭上風頭

風尚可炙腹滿何由通受氣我亦薄况乃疾病攻五十  
去始衰三四謝春冬鬢顏忽已彫血氣少復充客來索  
我書頽秃不能供茅君稍用事入手稱神工以茲日袞  
袞永負全生功長揖謝茅君安靜以待終

和梅侍御見寄

飛蓋凌滄溟高臺拂朱鳥乾坤一水浮日月雙輪繞塵  
埃紛局促正坐眼孔小景山千丈松慰我冰雪皎萬里  
一春風東西逐腰褱故人子羅子仙鶴歸華表暮雨江

門舟含悽問封草假令鮑叔在一士亦不少誰云越臺  
近舉目河山杳冥冥白沙塢雲烟共昏曉

題劉氏雙節卷

阿姑與阿婦守此芳歲闌三十寡且貧紡績供朝飡孤  
兒泣長夜秉燭更抱看苦心兩咽絕芳顏亦彫殘持此  
雙白璧輝映天地間

聖皇重民極門閭合施丹煌煌東白碑終古埋空山我  
母寡更早賦詩涕沆瀾弱草因風靡頽波良獨難

送李劉二生還江右用陶韻

夜聞桂樹芳晨起山鳥喧客從遠方來歷我階西偏手  
持諸侯書徵會在匡山我願結其人遂往不復還滯形  
宇宙內俛仰獨何言

中年見二子楚楚西江英問訊徐蘇里千年有餘情開  
樽對冥月高歌亦心傾胡為別我去感此秋蛩鳴贈處  
各有言慨然盡平生

漫題

日月逝不處奄忽幾華顛華顛亦奚為所希在寡愆章  
編絕周易錦囊韜虞絃飢食玉臺霞渴飲滄溟淵所以  
慰我情無非畹與田提攜衆雛上啼笑高堂前此事如  
不樂它尚何樂焉東園集茅本西嶺燒松烟疾書澄心  
胸散滿天地間聊以悅俄頃焉知身後年

仕者必期通隱者必期高廩鹿或可羣肉食安可饕聖  
人履中正白首濟川舫悠悠荷簣者果識聖心勞浮雲  
馳白日黍稷生蓬蒿飯蔬食飲水曲肱謝遊遨汶上去

不顧陋巷貧絕交徒聞武城宰割鷄以牛刀

拉馬玄真看山

官府治簿書倥偬多苦辛文士弄筆硯著述勞心神而我獨無事隱几忘昏晨南山轉蒼翠可望亦可親歲暮如勿往枉是最閒人近來飲酒者惟我與子真能移柳間舫同泛江門津

感劉琨與盧諶事

越石信英臣子諒亦文雅生遭晉運微奔走風塵下晉

陽笑明月胡雛夜回馬并州困石勒從事為別駕成敗  
非所論吾憐鑿坏者

和陶六首

歸田園

我始慚名羈長揖歸故山故山樵采深焉知世上年是  
名鳥搶榆非曰龍潛淵東離采霜菊兩渚收菰田游目  
高原外披懷深樹間禽鳥鳴我後鹿豕遊我前泠泠玉  
臺風漠漠聖池煙閒持一觴酒歡飲忘華顛逍遙復逍

遙白雲如我閒乘化以歸盡斯道古來然

高人謝名利良馬罷羈鞅歸耕吾豈羞貪得而妄想今年秋又熟謹呼負耒往商量大作社連村集少長但憂村酒少不充儂量廣醉即拍手歌東西卧林莽

近來織畚徒城市售者希朝從東臯耕夕望西巖歸貧婦業紡績燈下成歲衣但令家溫飽不問我行違

移居

萬金論買隣千金論買宅豈不念子孫而以營朝夕長

揖都會里來趨白沙役壤地何必廣吾其寄一席隣曲  
彌樂今園林尚懷昔吾志在擇善無然復離析

留連脯時酒吟咏古人詩夕陽傍秋菊采之復采之采  
之欲遺誰將以贈所思所思在何許千古不同時四海  
倘不逢吾寧獨去茲願言秉孤貞勿為時所欺

九日閒居

無錢撫秋菊向夕涼風生誰為白衣者頗識江州名映  
杯碧水淨曜日丹葩明天際雁孤去草根蟲一聲荏苒

委時節徘徊閱年齡興來發長歎意盡還一傾儉德苟  
不慙厚祿安可榮白首希高賢清謠渺遺情人生亦易  
足何必勤無成

和劉柴桑寄袁道見懷一峯之意

當年臺城會執手多踟躕四海一為別寒暑逝不居遠  
意屬羅浮舉頭望匡廬胡然金牛谷奄忽成丘墟蛻骨  
歸復土靈衿存為畚廡幾百代下攀駕以忘劬袁侯西  
江英好德眼中無尺素每欲近十年不作踈磨劍患不

快快則隨所須永願磨此心恢恢快劍如

和郭主簿寄莊定山

青松出喬木遙望十里陰少年不結友歲暮懷同襟  
問為誰定山攜一琴悠然一鼓之不辯古與今在昔  
經江東多士予所欽論交一觴酒惟我與子斟豈意千  
載下復此聞韶音我病不出戶何時還盍簪茫茫宇宙  
內與此契其深

贈羊長史寄遼東賀黃門欽

此心自太古何必生唐虞此道苟能明何必多讀書寂  
寂委山澤于于來京都斯人各有分彼此何能踰杪秋  
風日清呼兒理肩輿聊為玉臺遊言笑誰與俱屈指意  
中人一坐一踟躕歸來看四壁四壁光如如聖道日榛  
塞誰哉剪其蕪夫子久不見吾生何以娛常恐歲月晚  
況與音問疎申以伐木章一日三卷舒

飲酒

木犀冷於菊更後十日開清風吹芳香芳香襲人懷千

回嚙入腹五內無一乖雖靡鸞鳳吟亦有鷦鷯棲昔者  
東籬飲百榼醉如泥那知此日花復與此酒諧一曲盡  
一杯酩酊花間迷赤脚步明月酒盡吾當回

庚戌歲九月中於西田穫早稻

遲明向南畝疎星在簷端夫出婦亦隨無非分所安道  
旁往來人下車時一觀問津津不知仰視飛鳥還邏苗  
遠峙夕濯足荒溝寒吾惜耦耕好焉知世路難伐鼓收  
西畬黃雲被江干聊周代糟糠作粥歡賓顏隣叟攜兒

來嬉戲松下闕齊聲鼓腹謳永謝攢眉歡

懷古田舍

君子固有憂不在賤與貧農事久不歸道路竟徒勤青  
陽動芳草白日悲行人沮溺去千載相知恒若新出門  
轉窮厄得已聊一欣甘雨濡夕晡繁花幕春津獨往亦  
何樂耦耕多近隣百年鼎鼎流永從耕鑿民

製布裘成偶題寄黎雪青

海布剪黃雲巔綿莊白雪製為道人衣方直無周折吾

老不出門躬耕慕冀缺黃昏披此裘坐望梅村月美人  
遺我酒小酌三杯烈半酣發浩歌聲光真朗徹是身如  
虛空樂矣生滅滅

紫菊吟寄林時嘉

嚴霜百卉枯三徑挺秋菊綠葉明紫英微風遞寒馥芳  
情謝桃李雅望聯松竹懷哉種花人杳在江一曲遺我  
盎中金南窓伴幽獨時無續騷手憔悴誰當錄且脫頭  
上巾茅柴今可漉

感鳥

有鳥不知名皎然閨中清育雛上庭竹衆鳥不敢凌暮  
雨銜蟲歸喚雛雛不應以翼覆雛宿夜久巢屢驚小僕  
極殘忍不眠伺東榮扳巢襲其母母去巢亦傾一雛墮  
地死二雛尚呶嚶平明視竹根羣蟻正經營子弱母護  
之無母何以生嗚嗚號者死宛有雌雄情入簾逼我枕  
為我再三鳴此鳥初來巢卑卑近前楹我無害鳥心人  
謂此鳥靈終焉失所托此禍將孰懲吾甚愧此鳥感之

欲霑纓呼奴撻其背流血非所矜再拜謝此鳥此意何  
由平

賓陽樓八景

為丘侍御作  
今存其三

穀城呼月

微月瞰高樓樓中酒初瀉旁見穀城山孰為呼月者騰  
騰露光景寂寂開迴野笑問圯上翁何如此山下

、  
脾山樵唱

日夕樓上飲瞻望南山阿樵夫睨林木會意豈在多白

雲滿山徑負薪行復歌人生異出處貧賤奈爾何

羅水漁歌

有月來照人沉竿坐羅水意與羅水深夜靜歌亦起江  
湖雖云樂天地懼終否豪哉賓陽子發積異姜吕

題萬碩司訓風木圖

把君風木圖識君風木心賢者不易貴遠者寧務今嗟  
哉鼎與茵充足時所欽

築室

辛勤結吾廬經始算一策廣狹更度量卑高在平秩堂  
以備薦享閣以邀風日前榜貞節門後治渭川室四垣  
謝粉飾杜蠅高為骨仰瞻勢微峻其間僅容膝既以儲  
簡編猶堪斂袍笏是年秋在仲筮日欣得吉良友交助  
余衆工告易畢把酒對梅花浩歌新突兀

讀林緝熙近詩時緝熙典文衡閩中欲便道還家  
數夕前嘗夢見之故有是作

言笑不可親中宵馳夢想君行幾千里道路輕閩廣忽

見囊中詩區區謝官長深淵或遺珠努力試一往微官  
亦何事感激章欲上行止各有時姓名忌標榜此言誰  
為傳聊以慰俯仰

將如外海看山先寄道傍諸友

吾衰何所如俯仰在一席舍傍有小水相望渺南北靜  
久動乃宜住多行亦得朝往暮南還路旁事舊識故人  
邀我飯半餉吾未惜東老對回公神仙無惡客

秋興

西風振庭木虛堂夜蕭蕭攬衣起步月歸雁雙飄颻天  
地豈予獨知音不可招冥心祈有合悵望空雲霄

盛時不得意衰老徒悲傷志士曷為爾載籍多見之翹  
首面崑崙白龍有遺池振衣一千仞高詠秋風誰

海上有一士來往不知年或就胥靡飯或投上方眠游  
處各有徒孰謂世情然飲酒不在醉弄琴本無絃借問  
子為誰得非魯仲連

謝琴月惠荔枝

長夏風雨過西良荔枝熟晚有好事人提筐歸我屋老  
母不肯嘗馨香聞隔宿上以薦祖考交分及僮僕第令  
筐中有不畏稚兒哭爾惠良足嘉吾親素多淑在德不  
在物豈謂窮口腹東坡三百顆日啖不知足長為嶺南  
人千載披心曲

贈世卿

采菊復采菊嚴霜下庭木豈無桃李顏畏此天地肅落  
落枝上英未傷餐者獨持贈楚人歸投之江魚腹

青青墻下竹冬後色如是燦燦月中花歲寒香不匱新  
知語未足遠別情難置獨上江門舟北風日凌厲

進亦人所憂退亦人所憂得亦人所憂失亦人所憂所  
憂非憂道所憂其可留所憂非憂貧所憂其可休古來  
嚮道人能辯憂所由去去凌九霄行行戒深溝敬此之  
謂修怠此之謂流

元神誠有宅顓氣亦有門神氣人所資孰謂老氏言下  
化圓其蹟上化歸其根至要云在茲自餘安足論

可以參兩間可以垂萬世聖人與人同聖人與人異堯  
舜於舞雩氣象一而已大者苟不存翩翩竟奚取老夫  
嘗用力茲以告吾子文字費精神百凡可以止一落永  
不收年光建瓴水

上上崑崙峯諸山高幾重望望滄溟波百川大幾何卑  
高入揣料小大窮多少不如兩置之直於了處了

容珪輓詩

師友道久衰窮鄉無可者是非真妄間彼此不相假所

適一以偏較然見趨舍滔滔復滔滔風俗日益下珪也  
何所之終身在陶冶

四雛一母乳衍衍東山岑二雛羽翼長一去無遺音母  
哀二雛小中夜哀莫任感此骨肉別悄然傷我心蕭蕭  
暮色起脉脉春江深百年會有盡淚下雍門琴

容氏多兄弟西良此白眉源源來講席稍稍樹頭籬行  
可鄉人敬心惟我輩知臨危僕且至忍死待斯須

有懷世鄉

仙鶴去不歸黃鸝向人語空館忽相思雲山杳何許出  
門東望海默默空延佇月出潮復來鳴橈下滄渚  
時雨日夕來郊原藹新綠白雲被重崖下映寒塘曲情  
結竹上言魂消井邊躅三年隔瀟湘書至不可讀

伏枕廬山下春懷慘不舒哀絃久去耳風韻今何如灼  
灼花自媚嚶嚶鳥相娛高臺夕流盼古道行人疎  
煩囂謝人境抱膝山臺居奈此枝上鳥交交春雨餘少  
年耳目冗衰老不能虛安得魯連子從之泛江湖

觀自作茅筆書

神往氣自隨氤氲覺初沐聖賢一切無此理何由矚調  
性古所聞熙熙蕙穆穆恥獨不恥獨茅鋒萬莖禿

益母草

有草人不識棄之等蒿萊時來見任使到口生風雷洩  
也佐未足益以蜜與醅生者得其養死者無遺胎岐黃  
開本草天札人所哀一物具一周神功不可猜佳名夙  
所慕廣濟真天才

送劉方伯東山先生

未別情何如已別情尤邈豈無尺素書遠寄天一角江  
門臥烟艇酒醒蓑衣薄明月照古松清風灑孤鶴

遊圭峯同世卿作

窮居無歲年老夢得迂朽永托山水間東西事遊走幽  
幽鐵橋花悵望未得手杖履聊此躋微霜正疎柳斂襟  
欲無言會意豈在酒滄海當我前崑崙卓我後但談孔  
氏規坐失微生畝

示李孔修近詩

昔別秋未深今來歲方晏  
吾衰忘筆硯月記詩半板  
或疑予美聖未若陶潛淡  
習氣移性情正坐聞道晚  
為我試讀之如君當具眼

蔣韶州書至代簡答之

相別何悠悠梅花十寒整  
音塵中斷絕宵若墮深井  
忽枉尺素書開讀喜不定  
庾嶺秋正高揚旌下松徑  
君才足理郡韶民日延頸  
古來水火喻子產功在鄭  
歲計諒

有餘願聞下車令

八月二十四日颶作多溺死者

坐忘一室內天地極勞攘顛浪雷殷江流雲墨推障高  
田水滅頂別塢風翻舫大塊本無心縱橫小兒狀江門  
三兩詩饒舌天機上

讀張廷實主事近稿

世惟識寶人惜寶如惜子寶為物所拚念之容色悴一  
朝此寶來輒復喜不已喜戚由寶故以識為心累

贈鍼灸楊飛

昔吾見爾翁賣藥金陵市手持一寸鍼鍼落病者起我  
主大行人翩翩酒相值京中多異客飛蓋若流水一峯  
挾一囊有藥能醫世時當引疾去東西各飄逝歲月忽  
復多囊括鍼亦廢君來還見予俯仰相悲喜何期二紀  
下重睹無雙技瞻彼老定山風波五千里金陵多舊游  
存歿寧復記人生若浮烟為君語如是

正月二日雨電

是日雨水節

雨水不雨水雨電胡乃然小者如蓮實大者如彈丸仍  
聞隔江言有電大如拳吾君古帝堯神功格皇天電往  
而霰來無乃為豐年

後二日  
雨霰

五日雨霰

北風卷長雲晨光坐來滅映空絮忽飛誰謂越無雪  
元氣塞天地萬古常周流閩浙今洛陽吾邦亦魯鄒星  
臨雪乃應此語非謬悠

讀張地曹偶拈之作

拈一不拈二乾坤一為主一番拈動來日出扶桑樹寂  
然都不拈江河自流注瀛洛千載傳圖書乃宗祖昭昭  
聖學篇授我自然度

不習書絹殊失故態已付染師作碧玉老人卧帷  
矣呵呵拙詩紀興錄上顧別駕先生以博一笑

用絹不用裏下筆無神氣何況闢其行大小難更置能  
書法本同萬物性各異茅君疎而野拘拘用乃廢我且  
毛穎之安能免濡滯書成始大慙未忍水火棄持以付

染師經營卧帷事作詩告先生其契茅君理

贈黎秀才

月行在青天月影沉碧水誰為弄影人吾與黎生耳黎  
生青雲彥偶值薇垣使明月還端陽贈君惟有此

寄李子長

仙城李子長短髮不及寸家有覓粟兒時無郭元振經  
年斷往還使我勤問訊寧知造化心天地無情盡

祝融我當往往處還自然未往亦由我安知不是仙是

身元有患天道豈無緣難逢俗人說可為知者傳

卧遊羅浮

四首

登飛雲

馬上問羅浮羅浮本無路虛空一拍手身在飛雲處白  
日何冥冥乾坤一風雨簑笠將安之徘徊四山暮

度鐵橋

一度一萬丈飛空本無鐵何名為飛空道是安排絕夜  
久天宇高霜清萬籟徹手持青琅玕坐弄碧海月

下黃龍

天風吹我笠吹下黃龍頂  
兩手捉笠行不知白日暝  
赤松見我笑却立千丈影  
童子問赤松雲深各不領

望羅浮

山大必有靈土高豈無異翠  
浮幾千丈日月東南翳我  
尋五岳來未問仙家事  
絕頂望九州衡山正西峙

贈周文都

十年兩別君一別一回老  
問藥朱陵遊吾茲恨不早平

生憂樂心相對各傾倒遠別望眼昏浮雲不堪掃

寄題嚴州嚴先生祠壁

既上桐江臺復弄桐江釣不食桐江魚不怕嚴光笑衣  
巾人笑儂羊裘終未了堂堂范公碑千古稱獨妙

寒菊

菊花正開時嚴霜滿中野從來少人知誰是陶潛者碧  
玉歲將窮端居酒堪把南山對面時不取亦不舍

寄賀柯明府

世亂墮節義臨危忘大倫此風何可長此恨何由申仲  
尼憂萬世作經因感麟往者宋元間適逢大運屯仰天  
泣者誰屈指張陸文臨事誠已疎哀歌竟云云一正天  
地綱我祖聖以神缺典誰表章厓山莽荆榛寥寥二百  
年大忠起江濱慈元廟繼作爛映厓山雲近者陽江尹  
一念何精勤作祠比厓山兩廟存三仁大封赤坎墓昭  
昭愜衆聞深悲魚腹冷一躍海門春厓海風波隔陽江  
面目新自然聲氣應坐使風俗淳短卷心先賀神交夢

每親琢詞告萬世老病敢辭君

偶書所見

厓傾百丈泉直下注東川翳流起大春覆茅於其巔一  
為利所驅取便世爭先漢陰喻桔槔所見無不然嗟哉  
抱瓮心古道何由全

謝鄧督府惠交藤酒至

使來遺一樽百金不願易遇藥如遇仙竒方聞在昔卓  
哉李文公作傳甚詳悉感公嘉惠心何以酬公德但恐

命不齊服藥也無益

曉枕

天地無窮年無窮吾亦在獨立無朋儔誰為自然配春  
陵造物徒斯人可神會有如壽厓者乃我之儕輩永結  
無情遊相期八紘外

題端陽李太守甘霖重應卷

嶺南名刺史端陽有成績端陽問為誰長沙垂令德曰  
惟長沙公善非一代積去年苗欲槁公寢不安席手拈

一炷香須臾見昭假今年事復然斯民忤目擊甘霖雨  
下土郊野望四塞滂沱及隣壤秋田足民食公惠寧有  
心斯民感公德口頌遂成碑舉手還加額安得長沙公  
為我大邦伯坐令十郡內廣布陽春澤閭閻興孝悌四  
野無盜賊共育太和春綢繆謝反側

偶得寄東所

知暮則知朝西風漲暮潮千秋一何短瞬息一何遙有  
物萬象間不隨萬象凋舉目如見之何必窮扶搖

登高未必高老脚且平步平步人不疑東西任四顧豈  
無見在心何必擬諸古異體骨肉親有生皆我與失之  
萬里途得之咫尺許得失在斯須誰能別來去明日立  
秋來人方思處暑

和羅服周對菊見寄

春來苦不早春去常願遲嗟哉造化機萬物安得知歲  
晏菊始吐鮮鮮在東籬不污桃李塵永續徵君詩

龜山夜月

萬古此龜山萬古此明月開簾望龜山岱宗固無別但  
恐山多雲風吹亂人睫

馬牙香

爐中煨白朮坐上有青天綺季奕未畢夷齊上西山沉  
檀皆下品欲語不同年

題心泉贈黃叔仁

夜半汲山井山泉日日新不將泉照面白日多飛塵飛  
塵亦無害莫弄桔槔頻

贈伍弼歸覲

諸生胡不歸九月望庭闈山北山南道紛紛落葉飛呼  
兒巾木榻謝客掩荆扉不盡來時約堪沾別處衣

真樂吟效康節體

真樂何從生生於氤氲間氤氲不在酒乃在心之玄行  
如雲在天止如水在淵靜者識其端此生當乾乾

得何時矩書

良友惠我書書中竟何如上言我所憂下述君所移開

絨讀三四亦足破煩汚丈夫立萬仞肯受尋尺拘不見  
柴桑人丐食能歡娛孟軻走四方從者數十車出處固  
有間誰能別賢愚鄙夫患得失較計於其初高天與深  
淵懸絕徒嗟吁

五言絕句

曉起

偶然風折木村犬吠成羣此事真難免問君聞不聞  
辛苦南隣白遠雞方一鳴夜來風極急吹斷到窓聲

冬眠不覺曉開門見白雲雲中何所有童子兩三人

湖西九巖為一峯題

光霽巖

風月佳名在乾坤浪跡空從來巖下客祇與異人逢

翠華巖

來說湖西者不及華山頂誰知巖中仙解作石柱屏

清風巖

聲從竇中來可以塞天地借問采薇人便知風動處

府教巖

宋教授羅開  
禮所棲之地

府教英靈在虺蛇不敢居從來巖上月只是照虛無

極清巖

聲名野老畏草石貴人爭剗却巖中有悠悠是極清

英公巖

今名鐘英  
一峯所更

翠掩千尋洞青窺一竅天人間無絕境不要問桃源

扇和巖

即石  
柱巖

山骨短圓稜初疑削木成乾坤藏一柱猶得鎮巖局

卧龍巖

巖有龍潭龍床床之旁有石仙人

龍出潭水空龍歸潭水黑君從龍床來誰在龍床側

月巖

閣閣月墮地忽在天中央墮地人不覺中天照四方

題慈元廟

慈元一片石長留何處山厓門潮日至雪浪飛天闕

題畫

金籠鎖鸚鵡山木縱斑鳩巧拙知誰是天機不自由

題畫松泉為張別駕

松乃木之雄公亦人中龍何須看畫本千丈在胸中

對酒

放歌當盡聲飲酒當盡情門前烏桕樹夜半子規鳴

答丘侍御送酒

石齋書本拙酒力巧相扶欲報霜臺貺山中一物無

雨後

久雨方行樂花前望玉臺人間見花樹不似玉臺開

村步雜書所見

疎花明委巷細雨得今晨  
點綴非無意紅芳不是春  
公飯何曾接衣冠不作人  
齋中有名酒分爾一杯春  
晚食南山稻堂堂媿野人  
平生無可說一個白頭親  
村笛轟牛背山花結帽頭  
騎牛勝騎馬曲坂沒郎愁  
趁罷江門市商船奪港歸  
溪山愁引望城郭更須知  
日照南浦口初喧江市人  
小奴性嗜酒出飲畏吾嗔  
戲贈求書饒大中還江右

書法一家成風波幾月程孤舟愁度險薦福有雷聲

代簡答方伯彭公

大賢望於人往往非獨守難將一人意滿足天下口  
氤氲復氤氲東君欲放春梅花何太早早報越城人

絕句

清曉乘驢出北風吹澗藤沉吟澗邊道天意莫留行  
行止皆前定出門愁北風西郊不成往昨夜夢途窮

贈鄺知縣雲卿別

又送夫君別芙蓉花可憐水深難折贈留伴老夫眠  
與諸友夜過貞節橋

人影荒橋下蟲聲滿月中連翩雙大袖聊得颭溪風  
讀張主事近稿

雨中月不見雨霽月還多雨被風吹去無風月奈何  
對菊

浙浙西風至為秋未有涯江邊聊一醉信手得黃花  
不落龍山帽何須九日風更煩將小雨向晚洗花叢

春事歸桃李西風響未休長官三徑晚丞相一坡秋

菊坡

先生崔與之也

好個重陽節誰家酒不賒果然殺風景吸茗對秋葩  
天地花無數寒花色乃佳古詩拈未出除是長官來

九月木犀花盛開偶成寄賀黃門克恭

香逐西風起氤氲入杳冥不知從此去幾日到遼城  
洗竹

風引一叢竹搖搖四五莖橫斜今洗盡道眼看圓成

洗竹洗荒枝洗心洗狂馳老夫無可洗抱膝洗吾詩  
一洗一回疎相將洗到無客來莫問我北壁有團蒲

曉起

籬頭過井水不打隔齋門手握南陽布纏頭數竹孫  
老不愛春華一籬孤負花胡為聒我枕穉子打朝鴉  
自有無情蝶孤飛不傍花白頭聞見少閒動羽蟲嗟

贈張叔亨侍御

天下元無事勞勞我有心相攜沙上語山月二更深

觀羣兒釣

羣兒齊弄釣其一偏多遇餘三未得手投竿來上樹  
仰面看垂釣失脚墮危石若是謫仙人水中眠亦得

閱丁知縣傳

模樣從看拙丹青只寫真乾坤如許大具眼豈無人

夢中作

翩翩復翩翩天生我亦仙江山足風月吟弄到何年

夢丁彥誠

與君生死別三四歲星周夢語分明記相悲各點頭

對竹

竹色上牆多南薰綠幾何時無分付處野鳥自來歌  
窓外竹青青窓間人獨坐究竟竹與人元來無兩個  
北風卷頑雲陰晴安可卜海月出漸高獨照南窓竹

隨筆

苟能深積累豈患無高譽如何世中人甘心鐵爐步  
一歲十匹衣一日兩杯飯真樂苟不存衣食為心患

人不能外事事不能外理二障佛所言吾儒寧有此  
斷除嗜欲想永撤天機障身居萬物中心在萬物上  
小雨閉空齋青青竹映堦道人終日靜一枕到無懷  
子美詩之聖堯夫更別傳後來操翰者二妙少能兼

梅下雜詩

朝凭曲欄西暮凭曲欄東欄裏梅花好看花了病翁  
久共寬閒地儂薰自在香折來何所寄只是寄遼陽

賀黃

門欽也

贈人

萱親垂九十遊子尚天涯  
莫艤仙城棹南風夜引旗

讀易偶成

南乎不可北東乎不可西  
自從孔孟來君子恒處睽

張克修別駕約遊羅浮

重疊四百峯鐵橋在何處  
莫將別駕來同到飛雲去

張克修見訪

滄溟幾萬里山泉未盈尺  
到海觀會同乾坤誰眼碧

題劉鑑松

劉生於寫松能以酒力遣酩酊氣正豪蒼龍自舒卷

題扇

風檣拗欲折五月瞿塘過何如此庵中紅日抱膝坐  
張帆海上回帆掛鐵橋樹驚起白鰕蟆跳上飛雲去

贈胡地官次韻吳明府獻臣

有一范仲淹人將重名節馬上地曹郎翩翩起吾粵  
引滿花下杯延緣坐中客醉不大袖歌孰云此門窄

題林府尊壽家慈書後

馬尾緣封事魚緘壽老親古今誠一揆藉用白茅人

題顧通府集古倡和卷後

滿眼珠玉光高才極雄騁對之不敢言稚子來弄影

出化

書

訪客舟中

船頭酒多少船尾閣春沙恰到溪窮處山山枳殼花

夢後作

策杖獨行游青山一何深道逢采藥人問我松脂林  
見月時一吟夜涼天稱心回頭望東川流水無古今  
幻迹有去來達觀無古今長嘯人不聞山風吹羅襟  
揚柳餘朽株梧桐但疎陰小臥不出門不知秋已深

贈鄺筠巢

山中一夜秋老屋居然別丈人不飲酒共坐看明月  
客乞題隨時子軒

無雨笠且置未晴蓑不捨蓑笠用不窮我是隨時者

題扇

東艇拍西艇小拍庸何傷夕風起驚濤艇艇爭低昂  
一夫眉正揚一夫髮盡禿日暮船正歸前江風拔木

蔣韶州世欽挽詩

治郡聲名遠如何是我詩青山韶石老回首盡交期  
往事形骸外如今一夢休曹溪分我茗猶說蔣韶州  
周京聞母喪歸弔以是詩

萬里無歸耗形將一木親遺言入肝肺真得太夫人

題南窓壁

南風吹面處不省是南窓此意無人會乾坤落酒缸  
雨後示劉宗信林時嘉

一雨變新涼炎埃洗除盡廬山昨夜燈已照劉宗信  
秋來亦淫潦日月閱其光乾坤丈夫事千古空堂堂

漫筆

幅巾是秀才袈裟是和尙伎倆人共知長篇事標榜  
神泉八景為饒鑑賦其四贈之

太極涵虛

混沌固有初渾淪本無物萬化自流形何處尋吾一

浮螺得月

道眼大小同乾坤一螺寄東山月出時我在觀瀛處

茶山分香

江門白藕花我榻廬山頂君若去茶山茶香復誰領

神泉漱玉

焦明亦是鳳瑩焰只疑燈安得石上泉為洗世中育

九日

霜前淡淡花歎內深深酒今日陶淵明廬山作重九  
同俗不同俗山杯映秋菊仍聞席上歌不是人間曲  
歌舞重陽酒今年猶去年山中八石榻榻榻是回仙  
讀李評事承芳文

著論必無同乾坤孰此容人扶周孔教用世且無功  
一囊包宇宙到手問綱常所以東坡老嘐嘐薄武王  
不薄論交意因書稍稍知還將天下眼照破老夫痴

送劉宗信還增城

夜宿黃雲塢秋登碧玉樓歸時一片石見月過羅浮  
山到鐵橋西青天一角低送君高處望天與帽簷齊  
菊花笑我前梅花撩我後問花花不言駐楫增江口  
山人偶出村送客村南道江山風日佳歲月乾坤老  
贈張叔亨侍御出按雲南

到治一萬里使君行莫遲梅花開樹樹不是向南枝

碧玉樓晚望

樓遠見諸山目短意不盡天陰水怪興碧玉所以鎮  
贈克修別駕遷梧州守來別白沙贈之

甲兵滿一船江門來訪別贈君欲何言笑把梅花折  
少年恣行遊老病徒拘綴送君今夜心還到蒼梧去

贈陳馥湛雨

說到忘言處無詩可贈君許將臨別意一點落黃雲  
君若問鳶魚鳶魚體本虛我拈言外意六籍也無書

送李子長往懷集取道謁張梧州

春棹去江門  
沂流焉汲汲  
點筆烟外山  
歸來看懷集  
不聞端別駕  
敬士如子長  
問道蒼梧下  
登歌刺史堂

贈范能用

溽暑不可處  
清風時滿樓  
如何傳別教  
衲被坐蒙頭  
阮籍見孫登  
只聞孫登嘯  
針在繡不傳  
繡傳針不妙  
西良容倫餽  
荔枝非桂州  
本色戲以是詩

口溢桂州漿  
眼定西良色  
我是荔枝仙  
何人解漫得

壽南山翁七十

朝看亦南山暮看亦南山南山長不老聊以永君年  
萬株松上花千日杯中酒兒孫戲膝前一舞一回壽

贈太守黃公

水白端陽色梅紅嶺上花春風迎度馬秋月候歸槎

題宋丞相陳俊卿畫像

御史鐵為肝張秦掛舌端至今湖嶠月猶作太師看

題宋狀元陳文龍畫像

文章甲天下氣節愧當時公母亦滂母千秋名共馳

梁惟正鄧德昌往來白沙途中遇盜惟正以舟泊  
淺奔於岸避之德昌抱書立船頭盜不加害戲贈  
以詩

道逢惡少年打破兩生敬試問鄧德昌何如梁惟正  
曉枕偶成

采義非采薇食薇不食粟遙遙望西山千古嗟我獨  
西北多奇峯雲深香難認漢廷無謀臣黃綺皆真隱  
度危橋

事至絕安排  
放腳踏高崖  
如何謝上蔡  
旦旦習危階

贈閔督府還陞南京秋官

司寇今欲行  
病叟山中臥  
如聞經略憂  
未向春風破  
吾聞用世心  
中外無異等  
何由一送公  
細話東西省

贈林府尊

彼曰春泥人  
此曰人泥春  
晨朝出相送  
向夕望歸輪

贈李克常

桃花被東岸  
江水日日深  
贈君豈無言  
亦有花水吟

感事漫述與王樂用

丁侯為縣時不與謁者通古稱奉法吏秉筆惟至公  
留情重留情獄事果難明無輕赤子命為官急書程  
士而未聞道未免為物撓卓哉安心人外事若無好  
舍已莫委命從人莫登山嗚呼羅一峯逐善如轉圜  
寄淮上秋官姜仁夫

問客淮南道停舟過此無廬岡一端帛為我謝仁夫

答王按治求乃翁挽四絕

樂善堂

樂善機應熟垂聲教不窮江山無盡意猶在典刑中

月湖別墅

水月非無主長懷別墅秋湖光一萬頃端為此翁留

可怡亭

此地還成趣庭柯幾度板亭中人不見月照門前山

吳山壽藏

山隱一坏土人思百代傳無窮身後事未若子孫賢

題丁長官廟

何時重借寇此地一桐鄉四海諸侯望千年一炷香

會翠亭

東池久寂寞會翠得佳名小詩拈未出去尋王右丞

吳主簿詩主簿名則宣平人吳黃門仕偉之父也

軍門止殺 按狀正統己巳閩城賊流毒處民蟻

附朝命大司馬孫公原貞夷之知先君謀略禮致

幕下贊畫百協邑有三巖民多避難於上偏脅之

衆亦有聞義而歸者命先君統之推誠示信無不  
感服寇平孫又欲行法先君泣曰殲厥渠魁脅從罔  
治矧既歸命殺之不詳竟得免奏功授鮑村巡檢  
泣罪天應見坑降地不知自然殃慶至天道不須疑

過與弗取 按狀景泰間分麗水為宣平復命  
先君董其役代木於山役力於民期年而功成  
孫曰難平邑作昏爾之能餘木尚多可治爾居  
先君辭曰功成於上愚下何有明公芟夷大難

布德於瘡痍之民一方獲安某也受賜多矣且  
官物不可入私門未敢如命孫益敬之

百世高公綽千金謝魯連胸中無雅度勝事竟誰傳

卜築西溪

按狀鮑村任滿陞華亭主簿愛民

如子處國如家凡有議讞多稱平焉且疏子下

民濬河渠禁賄賂等十事於朝皆賜可松之地

狹於蘓而漕數反出其上又為民陳情得減北

運一萬石事載雲間志在松十年勤勞罔懈僅

五十而二毛蕭然歎曰天道四時功成者退庸  
可不知止乎遂乞致仕而歸卜築西溪之上

主簿能經濟中年未乞身西溪看卜築知是宴眠人

寄嚴州林郡博緝熙

萬紫千紅外如君故可人桐江都滿樹海驛尚含春

寄東所

春江正滿時未具衡陽楫還攜鄧俊圭江門與君別

夢林緝熙

酒闌歌不起老病無奈何夢滿桐江雨相對不成歌  
山樓本無夢我自夢嚴州嚴州誰夢我白雲天際流

答柯明府

終秉循良筆難逃俗吏嫌不知三考績課最竟何須

贈雷少尹還汀州

桔槔滿天地抱甕古來難哦松非俗吏哦松不在山

覺後

馬圖不出河鉛刀不割痴上下幾千年揜卷一沾衣

謝姜大參惠酒

名公遺我酒洗殘自開嘗何以酬佳貺商歌示不忘  
武進八景為徐嶺南紘作

龍山春雨

長夏龍山曉人間望忽開長風捲雨去復送雲歸來

笠澤烟波

何處烟波好公乘笠澤槎我泛江門月乾坤共一家

龜山夜月

夜半龜山月能開萬頃秋試從開處望照公湖上樓

陳灣疊嶂

丹青工寫似陳灣疊嶂新我詩君莫笑還屬姓陳人

薛堰通津

薛堰歸何處披圖想其區古來探本論無欠也無餘

亭山夕照

亭山不可喻華頂凌天台卑高本自形夕照從西來

廟墩靈跡

抹溺如救火造次遂捐生金陵人去遠拗鬼不來爭

板橋書屋

板橋藹吾伊名稱已蓋世誰云龜山月不照新堂睡

答無錫諸友

碧玉通書久青天感興新江門動秋思聊因寄遠人

送米與何侃

野饌家禽小村春晚粒香莫言無厚餽吾意在分嘗

九日用舊韻

新筓壓兩壺落英攜滿袖我非陶長官廬山還九九  
送黃希顏之太平推官

有官五馬後無官百揆前不將前後看須著有無言

題高璠詩集

神交傾蓋上心遠著詩時無由向人道人亦豈能知

紀夢

一別三十年相逢不相識骨肉為路人春風淚沾臆

寄潘留鶴

有時牛亦坐何處鶴還留天台二萬丈誰踏紫冥謳

題伍光宇碑陰

松柏孤高處春風更可尋如君有賢配昭德在碑陰

答廷實有懷見寄

白雲滿中野此地即衡山莫擬西來棹須防失路難

謝孟芳遺腹生男

充閭人所喜今日愴還深憶我初求乳誰知母氏心

贈吳惠州繹思

皂蓋朝天闕青山道故鄉高堂開壽筭醅酌別莆陽

鵲鵲

初日上茅簷江邊有畫船八哥莫饒舌有詔許歸眠  
鵲鵲能言鳥能言我恨無白頭書小楷不及蔡君模  
九日諸生攜酒飲白沙醉中和答

老病得狂痴謹呼九日期自補登山屐誰供把酒卮  
諸君為飲會老子不須期盡數籬前菊一花拈一卮  
九九八十一去來無窮期元精為我酒大塊為我卮

對酒用九日韻

秋花新氣味秋月舊襟期獨唱花前曲閒傾月下卮  
行年三十許已卜入山期處處開花徑牀牀是酒卮  
飲酒何必多醺酣以為期不辭亦不勸三卮或五卮  
作詩尚平淡當與風雅期如飲玄酒者器用瓦為卮

梅花

水陸花無數南枝愛殺人遙持一杯酒江上酹花神  
逢人問除日君得地曹郎此意憑誰寄梅花隱石床

謂東

也所

九日懷麥岐時往江東未返用前韻

東西填脚債已過一秋期今日拈花處思君第一卮  
茱萸何處酒勝日與君期漁翁歌獨釣江月夜明卮

六言絕句

周鎬送白菊乞詩

陶令黃金遶舍君家白玉滿園千古清風廬阜幾叢細  
雨江門

微醉不須酩酊半開莫待離披安得季芳與語相思欲  
寄一枝

白菊偏宜素髮青山只對蒼顏  
黯罷秋香滿腹風吹不到長安

邀丁縣主賞菊

社會賦詩不就公當酌我杯盤  
小酌倘尋舊雨東籬還對長官

題枕

太華峯頭一枕千秋萬歲通靈不怕惡蛙驚睡鼻端三  
月雷鳴

漫興

風灑數莖白雪月臨一丈青筇餘事歸詩卷裏殘年放  
酒杯中

景斜瓦碗方食日晏柴門未開五柳前身處士一瓢今  
日顏回

晨光沼上魚戲夕陽村邊鳥來東隣小兒識我一日上

樹千回

翠烟綠樹歌鳥青水紅渠浴鷗笑問五湖范蠡清風何處扁舟

七言絕句

伍光宇卜室白沙為讀書之所

君此卜居君亦足空村無人山多木參差芭蕉麗晨旭  
新葉新心遞相續

競晨登登聞隔竹東隣老人事幽卜甌甌瓦盆不供俗

我不到門此翁獨

答段錦衣惠藥

藥來詩往共誰忙  
野老無金與段郎  
泉石旌旗俱在眼  
不應泉石獨膏肓

聞攬山近有車馬之蹟因贈緝熙并寄竹齋丈

白日傳呼攬翠崖  
誰家玉樹碧雲埋  
只疑冬酒開松逕  
定有山靈怨竹齋

偶成

牆角經春卧短筇千秋塔骨不如公  
科頭坐轉茅簷日  
閒看蛛絲蕩午風

夜坐與童子方祥慶話別偶成

晚飯跣趺竹几安  
秋吟涕淚閣燈殘  
一詩可送方童子  
千煉不如莊定山

往潮連人事

獨速蓑衣舞我航  
數家烟樹隔迷茫  
不將起倒供人事  
祇為看花也未忙

柳渡月下承菖溪翁約賞中秋月於潮連

年顏欲比菖溪老酒殘同揮夜月圓來共主人秋半醉  
更回楊柳渡頭船

次韻張叔亨侍御見寄

酒舫當年興未涯清宵人語白鷗沙如今縱有相思夢  
不到長安御史家

看柳

淺塘低竹小堤村黃土墻扁白板門望見西頭楊柳樹

行人都訝是桃源

雜興

曲肱深閉倚山閣  
照眼不堪臨路花  
一身老去何須出  
兩脚朝來只欲麻

倚檻纔看一兩花  
不堪終日雨斜斜  
先生已結僧趺坐  
還與人間管歲華

白日幾時生羽翼  
金丹負我不神仙  
東家茗碗頻分啜  
兩腋清風也可憐

溪橋晚立示諸郎

溪邊明月掃不去竹下清風時一呼天與乃公供打睡  
莫安橋板引樵漁

齋大父忌作舊居在道娘墳東

道娘墳西近官路朝朝暮暮行人多世事百年渾不省  
滿堂賓客竹枝歌

贈釣伴

短短萋萋淺淺灣夕陽倒影對南山大船鼓枻唱歌去

小艇得魚吹笛還

得陳德雍書年九十餘矣猶有願學之志

越客初披手翰新天涯暮雨欲沾巾可憐一片長江水  
日夜東流不待人

望頂湖山

客子正歌山鬼句篙師欲進頂湖船遙看落日蒼梧外  
獨立橫槎古寨邊

夜過三洲巖讀濂溪題名示諸生

山容寂寞紅葉老江月照耀青天高題名夜半尋周子  
秉炬相隨愛爾曹

歇馬大徑山

數家烟火隔林塘一樹寒花晚自香黃葉塚頭聊歇馬  
鷓鴣聲裏近斜陽

華蓋仙蹤為謝布政作時謝已物故

華蓋山頭雲起時羣仙雲裏謝彈棋謝公不用登山屐  
借得千秋一鶴歸

東軒獨坐

桃花寂寞梨花開  
山中薄酒三五杯  
村西有客可人意  
風雨今朝期不來

虎夜出

虎頭絕淵雨即下山  
中白額還遭打  
今年雨足汝不知  
稍出人間食牛馬

次韻趙提學見寄

蒿萊封徑不腰鎌  
長夏山齋睡正甜  
風送歌聲滿天地

驚回殘夢雨廉纖

老大行藏敢不疑  
曉川紅日睡醒時  
昨宵共對崖山雨  
如此乾坤那得知

古有所思

采采紅芳日欲斜  
盈盈珠淚落天涯  
東風忽攪籬前樹  
惱亂春愁只為花

卜日修外海赤泥嶺祖墓值雨

冬雨墳頭蒿已生  
年年披草祭清明  
晚風吹落攜鉏艇

又聽輶輶隔水聲

與景星夜坐

撥悶無人致酒瓶  
哦詩燈下一郎清  
夜深笑拍胡床語  
忽亂階前落葉聲

西樵山下感舊

西風吹老錦巖春  
遺跡荒涼此水濱  
雲氣不遮西望眼  
青山剛對獨歸人

西樵山前暝鶴歸  
縞衣雙拂錦屏飛  
淒涼夜半孤舟客

一聽遺音淚滿衣

德孚先生留此眠南山揮手白沙船

伍光宇號小南山

江山此

日三人別誰道人生無百年

示建旌節亭役者

照曜乾坤功不小此風此日更須扶泮宮畚土皆民力  
不共城郎一例書

次韻趙提學留別白沙

列炬溪邊樹影斜隔花遙迓使君車酒杯欲別微風起

吹動馨香下柳沙

蕉麗望羅浮

翠錦為山白錦雲畫工傳影不傳神  
今朝蕉麗江頭望  
魂爽何由得傍身

黃連濬即事

青草橋邊船未歸  
曲川微雨暗荆扉  
江村盡日無來往  
夫在東皋婦給炊

上帆

蜻蜒翅短不能飛  
款款隨風墮  
客衣此是天人相合處  
蒲帆高掛北風歸

初晴

初晴樓上燕飛飛  
樓下歌人白苧衣  
一曲未終花落去  
滿林啼鳥送春歸

落花

落花半落流水香  
鳴鳩互鳴春日長  
美人別我隔江浦  
欲來不來空斷腸

清曉

清曉有人來款扉風吹衫袖白披披昨宵雨打山窓破  
莫怪先生下榻遲

對酒

半開半謝花相催江水東流不復回扶杖江頭看花樹  
不知笑向酒家來

喜生姪

兩翁筋力少翁衰竹杖先堪付若兒只恐暮年詩更逸

出門須背錦囊隨

新設紙帳軒中

如雲白紙罩方牀翠簾眠穿我固當世到萬天終不遠  
先生枕外即羲皇

階面苔侵牡蠣牆小軒容易領年光只從今夜床頭月  
已照先生鬢脚霜

雜詩三首

十年自汗不曾乾枕上殘書白首看莫道無心與君別

樽前更覺別君難

人間骨肉薄秋雲一事朝來不忍聞何處青山封宿草  
欲將衰淚灑孤墳

平生交態如兄弟此日悲歌不忍聞欲寄秋風兩行字  
九原無雁獨憐君

宿倪麟所石榴花秋開

老蟾半影秋如水曙色一聲霜滿街白髮山人到城府  
石榴花下借眠來

催諸友九日詩課

九日樓前客令新  
黃花愛酒不饒貧  
勸君火急交詩課  
纔到明朝罰主人

題杜少陵小影次韻柳文肅

孟子詩肩高聳山  
杜陵談笑古風還  
世間還對憂時畫  
美酒花前已破顏

與舊童子

神藥燒茶伴老夫  
昔時童子今生鬚  
青春過眼如白水

白雪滿頭非故吾

謝惠酒

白髮蒼顏老石齋出門秋思滿天涯  
極憐紫酒逡巡有不負黃花點綴佳

五月二十七夜颶風作屋漏

燈殘四壁漏痕斜老屋回風落細沙  
乾坤更有晴明日為報家人莫怨嗟

題畫

赤壁磯頭天欲曙  
縞衣和夢掠舟西  
欲尋故處何由見  
長恨今人畫亦非

題月溪卷

月出東方白漲溪  
溪翁行樂溪東西  
相思欲過隔溪去  
南斗無光北斗低

贈周鎬兄弟

周生兩馬齊兩鞭  
京指長安鎬在山  
今夜尊前看秋月  
明年秋月憶尊前

秋日

山河一望仲秋前  
楓葉初黃水半川  
路上行人不歸去  
北風吹爾過殘年

木犀未發奈蓮空  
小女來方剪綵工  
不信衰榮是天道  
覓花無處怨西風

閱馬氏均田文

王侯尚愛橐中裝  
何況田家弟與兄  
孟子未知人世事  
獨將仁義教齊梁

贈鄧栢林其人貌似伍光宇

南山面目偶然同又向人間見此翁  
碧羅窓下一杯酒猶勝良宵夢裏逢

此老若是石曼卿此山便是芙蓉城  
高歌獨控青驄去是有風流萬古情

喜雨

滿眼珠玉不足珍甘雨一灑萬家春  
昨日蒼頭木洲至又道木洲飢殺人

將如東莞聞途中盜發不果

扁舟東過扶胥口一日二日之便風何故三旬不成往  
仰船岡下賊旗紅

題朴軒

葛洪亦號抱朴子安知朴翁不是仙莫將甲子編年看  
人道翁生大撓前

題應憲副真率卷

今古一杯真率酒乾坤幾個自由身春風回首黃巖會

醉插花枝少一人

茶園曲寄治香櫃袁暉

峽東灣灣一水長商船無日不蘓杭千村萬落無窮樹  
盡是袁郎櫃裏香

插花

巖前上馬興難拏卯酒三鍾帽半斜兩鬢馨香齊插了  
賽蘭花間木犀花

訪山家次韻

樛枝逕口郎迎馬語鳥籬前妾掃雲笑殺主翁忙出戶  
手提筐果喚厨人

清泉煮巖愛山家夜飲西巖望月斜澗底白雲留不住  
半隨紅雨落天涯

蕭黃門書來見責久無書用舊韻答之

諫官一字照天涯南海年年問釣沙滄波不與黃門信  
笑殺龍鍾百姓家

平鄉伯陳公以紫茄花絹為家慈壽詩以謝之

吳紉衫色紫茄花老親着時衆口誇小兒奉酒歌七字  
持獻軍門表拜嘉

景雲偕范規海上割稻

犬子給炊海上舟范生打漿兩同遊田中割稻家中望  
逢著諸仙莫浪投

招訟者歸

越王城裏塵隨馬刺史衙前吏唱人此日王孫不歸去  
舊遊芳草可憐春

中秋期諸友不至

山妻有錢肯沽酒諸友賦詩期不來范生也逐吾兒去  
一夜清光對玉臺

贈鄭載道之淮陽別駕前御史謫黃巖

十年花縣眼中人別駕淮陽又幾春曾共烏臺高十仞

鄭郎今著白綸巾

鄭紀也

感事

齒本生來不著唇吮吮衆口劇鵝羣鼻雷自炒元城耳

夜半鐘聲那得聞

木犀四絕寄倪麟

正月山桃委地紅  
柳塘還捲落花風  
木犀一樹渾堪賞  
盡日相看烟雨

風雨歸來問小奴  
藥欄花架費人扶  
黃昏雨歇茅簷月  
只有木犀對老夫

春城無日不思家  
風雨經旬損物華  
竹色四時長不改  
平安先報木犀花

風吹雨打只傷神  
白首龍鍾尚愛春  
花意未應嫌老醜  
十年前是種花人

題兩山居士卷

墨水翻騰作巨川  
兩山何處灑雲烟  
醉中亦有臨池興  
悵望名家不敢言

題東所卷

東所詩成月滿衣  
乾坤無語鬼神悲  
郎今欲到飛雲去  
說與兩山居士知

問鄺珙病

鄺生病肺今何如獻歲初驚得手書我有丹方欲傳與  
小藜床上半跏趺

次韻陳冷庵僉憲見寄

擊壤聲中酒國春海風吹老石邊身桃花幾樹衡門下  
我是唐虞一輩民

乾坤畫筆久荒蕪誰作臨江五老圖聞道遠師將結社  
華巔猶得照鄱湖

五十四年居海濱偷將水月洗心塵今朝偶得西江使  
溟海猶堪把贈人

別意

江閣醒眠秋正涼西風殘漏轉離腸不知天道平分未  
已覺人間一夜長

悼林暕

一日之雅亦為哀鍾淑相隨入夜臺此生未了男兒事  
也向扶胥打坐來

木犀開時江右李士達劉希孟已去容貫范規江  
浦未還因有獨賞之歎

嶺北書生嗟去早江東遊子惜歸遲重陽將近無風雨  
正是木犀初發時

先子忌日作

生來只見山頭土祭諱惟聞月下螢五十四年天頗近  
諸孫羅列拜成行

題畫

茅簷秋颭酒旗風  
舟入蘆葭月半籠  
醉睡不知家遠近  
醒來依舊五湖東

寒山鐘近不成眠  
人在姑蘓半夜船  
何處明朝正堪望  
吳王宮苑草芊芊

金陵城西趨市郎  
負戴不厭江路長  
百花橋頭換美酒  
歸與漁父歌滄浪

古耶道中有懷

翠烟浮隴麥初齊  
社樹青青獨鳥啼  
何處相思不相見

木棉花下水門西

小湘峽食嘉魚

兩山斷處小湘峽十月嘉魚出水鮮  
引滿阿儂生日酒  
微吟空記屬牛年

自三洲還至祿步村

江流夾束午風柔城郭歸來祿步舟  
惆悵碧桃歌舞散  
黃茅烟裏一輶輶

過清遠峽

行人初上峽西頭已有心隨下峽舟天下名山皆可愛  
夢中慈母不來遊

讀鱸魚文

刺史文章天下無海中靈物識之乎如何皇甫魚逢吉  
不及潮州一鱸魚

食蜺

家住東南蜺子村小鐺風味勝侯門眼前下筯非無處  
芹曝猶堪奉至尊

社中

桑林代鼓酒如川  
秋社錢多春社錢  
盡道昇平長官好  
五風十雨更年年

社屋新成燕子來  
山丹未落野棠開  
三三兩兩兒童戲  
弄水扳花日幾回

社酒開顏一百家  
春風先動長官衙  
東君也解遊人意  
紅白交開樹樹花

社日年年會飲同  
東原西埭鼓鼙鼙  
無人不是桃花面

笑殺河陽樹上紅

夜酌

侍子焚脂弄小孫  
藥爐分火暖殘樽  
東風不管黃鸝怨  
一夜飛紅滿樹根

問李深之病

竹林花埭酒旗風  
秋賞春遊事事同  
伏枕六旬猶未起  
相思紅日滿簾櫳

沙上

村逕西來入社松  
北山終日白雲封  
往來獨把梅花笑  
只有沙堆不負公

秋江喚渡

何處渡頭風浪喧  
隔波仙境似桃源  
瘦藤倦向人間去  
喚得船來便上船

春寒

清明天氣如初臘  
雨脚雲頭枉是春  
階下荼蘼開自晚  
不隨紅紫怨東君

一春光景在花枝三月殊非陰雨時只有木犀偏耐冷  
小枝簷下對衰遲

看花何處輾香輪江上春寒著莫人衰病未堪供起倒  
且便高枕過殘春

題棲霞卷

紅霞小塢地仙家日出耶溪十里花秋竹垣低是何處  
有人窓下讀南華

雜興

數行屋蟻下庭蕪  
牆角扶留綠映裾  
正是滿樓山雨過  
夕陽惟好鷓鴣呼

讀朱晦庵註參同契

神仙不註參同契  
火候工夫那得知  
千古晦庵拈一語  
可憐無及魏君時

大水浮舟至七星巖頂題其上

七星巖下醉神仙  
猶占龍床水底眠  
我有一樽延壽酒  
月明今夜對南山

蒼梧寄陳庸時館潯州

山形西上水東流獨泛長江十日舟無翼可隨飛鳥去  
相思時復到潯州

題林良為朱都憲誠庵先生寫林塘春曉圖

烟飛水宿自成羣物性何嘗不似人得意乾坤隨上下  
東風醉殺野塘春

出肇慶有懷馬玄真

紅塵白浪去來年細雨秋江看木棉何處思君君不見

羚羊峽尾七星前

金州別陳冕

江上東風捲暮旗  
木棉花下進舟遲  
金州未是窮途別  
莫贈黃金只贈詩

漫興

粉牆經雨舊成痕  
青被扶留直到根  
俗吏歛門教暫去  
隔簾拋果戲諸孫

畫鷹

落日平原散鳥羣  
西風爽氣動秋旻  
江邊老樹身如鐵  
獨立槎牙一欠伸

木犀枝上小鵲

翠裙白領眼中無  
飛上木犀還一呼  
乾坤未可輕微物  
自在天機我不如

贈周成

虛無裏面昭昭應  
影響前頭步步迷  
說到鳶飛魚躍處  
絕無人力有天機

春中雜興

春寒著莫絮袍輕遊走何山更乞晴  
夜夢髯翁作人拜  
安知不是白龍精

小雨如絲落晚風東君無計駐殘紅  
野人不是傷春客  
春在野人杯酒中

香烟裊入袖中蛇讀易山齋日未斜  
領取乾坤分付意  
扶留生耳木犀花

端陽後一日里人送角黍酒至

荷歌童子問誰家老婦簷前駐紡車  
角黍喚回端午夢還從艾瑣得松花

九日木犀未開

野徑香沉舞蝶稀柴門樹老著花遲  
含章此日無窮意只有階前拄杖知

菊來栗里何須酒梅到孤山不欠詩  
老去未甘詩酒廢木犀其那放花遲

木犀花下待陳秉常

常疑楚客餐秋菊不信唐人醉牡丹何處木犀香可愛  
須君曾到玉臺山

謝九江惠菊

誰將此菊種江濱物色當年漉酒巾若道淵明今我是  
清香還屬隔江人

紫菊移來紫水濱白頭對著白綸巾花前酌酒笑未足  
酒後簪花笑殺人

故根迢遞九江濱歲晚相看此道巾不用詩流強分別

種花人是賞花人

鶴袖披翻野水濱  
黃花簪破小烏巾  
腰間我有坡翁帶  
解與西隣賣酒人

夜夢見太母急呼諸孫前拜

欲覺未覺夢中夢  
有形無形身外身  
喜逐悲來呼不得  
曾孫前拜太夫人

馬肇文惠油酒并錄示哭一峯先生詩及送林緝  
熙掌教絕句復以香一束賦三絕見意

誰以三年報一峯舒剛益有古人風一詞亦到君親地  
何處無人覆馬龍

清油濁酒慰家貧老子山中但白雲君欲看雲須久坐  
晴窓端為起爐熏

南川釣艇已橫波裏水漁翁又放歌今日未知明日事  
且傾君酒為君哦

贈周二仔入京

文都家僕

故人訝我久無書只到長安夢亦疎萬里周郎知此意

杖藜江上送長鬚

次韻張廷實東所寄興見寄

天邊暝色將秋至海上長風送月來  
何處無人識東所  
夜分樓上了餘杯

明月清風放兩頭一筇挑到古尼丘  
而今老去無筋力  
獨坐江槎看水流

扳緣千尺采松花服食為仙未到家  
我得丹方欲傳與  
肯捐妻子入烟霞

路自飛雲過閬壺仙人迂我久趙趙相期汗漫歸何處  
獨占烟波理釣魚

放倒瓊林半醉間半留醒處著江山病來只有冠裳在  
不帶朱門一事還

不求老馬在長途誰道長安一馬無伯樂未來憂薊北  
憑君傳語到平湖

邯鄲枕上看三台誰撼蓊床喚老來幽事不應全廢却  
夜來風吼澗中雷

西風吹老木蘭花水閣氛氲帶晚霞溪上行人不相識  
隔船對語問誰家

海上峯巒今屬誰攜來四百布囊垂或嫌珠佩多遺恨  
化作長髯未可知

門下諸生無一個山童撤却皐皮坐與儂七尺青團蒲  
今年換與張東所

沽酒

酒店無錢與酒遲初晴天氣菊殘時乾坤不放閒人醉

也到江門酒盞知

題南浦送別圖為蔣方伯

何人更賣雲卿屨我昔曾過孺子亭欲寫別離非此日  
西山南浦認丹青

對菊

花開無酒醉江濱莫笑人間破葛巾  
廬阜長官歸未得看花還共去年人

餐香誰亦到湘濱西崦東籬濫一巾  
去歲金英曾照我

今年玉蕊又驚人

白雁南飛到海濱  
吟邊芳氣襲衣巾  
門通水竹三丫路  
坐對求羊一輩人

秋英如雪照江濱  
板折須防小侍巾  
曲檻兩頭門盡掩  
先生元是惜花人

日日狂歌菊澗濱  
花神應識玉臺巾  
西風為掃繁華去  
不遣紅芳近老人

花舫誰撐綠渚濱  
道人醉脫碧方巾  
東籬不飲江州酒

彭澤當年未盡人

精魄當歸楚水濱  
天涯聞訃忽沾巾  
西風吹醒蒲團夢  
獨對黃花憶故人

扁舟何處剡溪濱  
夜半歸來雪滿巾  
爭似一瓢秋菊伴  
漆園風暖蝶疑人

我貌不如蘇頲濱  
秋風華髮已盈巾  
有錢不買重陽醉  
籬下黃花也笑人

菊坡持酒越江濱  
御筆親題與醉巾  
丞相九回徵不起

碧虛長揖夢中人

知章投老鑑湖濱  
還戴華陽羽士巾  
元亮也歸三徑去  
至今人笑是痴人

陶家園裏舊開叢  
復入山窓對此翁  
一曲一杯花下醉  
人生能得幾回逢

種扶留用舊韻

輕落藤梢淺打溝  
種時須共小遲留  
浮生日月供眠外  
付與攜鋤抱甕休

繫矩工夫但一溝山中夜雨長扶留莫教看到詩人眼  
千首鳶魚也未休

漫興

娉婷鄭女著纖羅能為襄王激楚歌一曲霓裳都掃盡  
尊前無地舞陽阿

贈麥岐出遊

錯教人意向花濃萬樹香飄一夜風行過東津莫回首  
一番春事又成空

我得無言贈麥岐乾坤遊走到何時千山萬水無窮意  
分付芙蓉杖一枝

八月八夜忽夢玉宇無瑕碧雲燦爛南斗下大書  
八字云生生德俊逸超全下有四人面西而行  
或隱或見覺後紀以絕句

八字光騰斗外天碧雲西去擁羣仙乾坤此夢無人話  
起步中庭月上弦

贈人

誰將兒女浪干情  
春雨來時草又生  
夢亦是真真亦夢  
石泉槐火對清明

悼周鎬

京之兄也京以母命赴春官鎬亡京南歸在道

一封長夏寄京書  
不遣歸來待拜除  
誰與行人報消息  
高堂今日要人扶

一雙玉樹出東溟  
豈意先隨曉露傾  
三十六年惟一女  
老夫垂淚寫銘旌

叔子還家定買碑  
墓旁將刻老夫詩  
詩中不借閒言語

只寫人間母子悲

嗜好平生法帖詩偶逢方士問刀圭何人擺脫浮生事  
得似周郎易簪時

里巷三年六七墳老年無淚哭交親數聲願借遼陽鶴  
喚醒人間未死人

望白龍池

在本邑崑崙  
崙山頂

西望不見崑崙池白龍上天歸何時望中心逐飛雲去  
半掛玉臺松樹枝

涵虛數尺鏡光懸舊是頭陀洗鉢泉又有山人來洗耳  
白龍休占水中眠

雲影天光共一池池中消長白龍知仙翁騎龍上天去  
只有明月照漣漪

梅花

一枝低壓塢籬斜細路穿雲竹半遮忽被暗香相引去  
小塘詩景在西家

老樹眠江水留之茫茫水月浸花枝暗香捲入滄溟去

不是漁翁那得知

沙籠寒月樹籠烟香徹龍溪水底天斜隔竹林窺未得  
更尋西路上漁船

南枝照水忽先開漁父灣頭有釣臺罷釣歸來溪路暝  
暗香幾度倩風媒

孤山山下一枝梅春到南枝尚未開酒醒西樓看月坐  
清風湖上捲香來

朝來溪上弄花丸天地氤氲日月還無覺暗香疎影處

笑呼歐九問孤山

氣魄壓  
倒孤山

梅花撩我又冬殘落日深山一凭闌病眼不知花妙處

只將花作野人看

梅花如雪擁溪扉漁父村南負酒歸縱飲不知花落去

酒醒船上見花稀

日日花邊喚酒船梅花開處酒家眠青山一片無人買

誰與先生辦酒錢

樵客入林聞曙鴉梅梢殘月暗溪沙沿溪路盡無人到

更說林逋住處賒

舍南朝見一枝梅  
舍北桃花昨夜開  
笑問花開何太急  
青春肯逐酒錢來

南北枝頭月正懸  
月中誰此弄溪船  
晚來吹入梅花去  
吹到林逋木榻邊

蒼烟裊樹溪冥冥  
夜半江樓笛一聲  
悵望錯疑溪女折  
滿頭只慣插金櫻

桃花

雲鎖千峯午未開  
桃花流水更天台  
劉郎莫記歸時路  
只許劉郎一度來

山中兒女不知秦  
無賴漁郎最惱人  
溪上桃花君莫種  
東風不貸武陵津

題袁氏知歸卷

鳥在蒼岑魚在淵  
水深林密保生全  
秋風莫怨茅茨破  
白首眠看榻頂天

陰厓水必到滄溟  
石罅涓涓勢已成  
萬古乾坤流不盡

望湖亭下更分明

示我陰陽闔闢機  
春陵墨雨灑門扉  
直從罔象前頭見  
人與乾坤一處歸

界江八景

河橋柳色

廬阜清風長官宅  
渭城朝雨王維詩  
東西綠遍河橋路  
長與離人照酒卮

驛館槐陰

金  
卷五  
槐陰覆庭日早午小吏夜出迎當路長江閱盡往來人  
淦水西邊此槐樹

蘆渚晴烟

香蘆紫烟生一縷天風吹落蘆花渚江東行客歸去來  
霑衣猶帶金陵雨

古阜漁燈

埠頭半點夜燃枯釣得淞江一尾鱸漁父聯舟向東岍  
東岸人家有酒沽

界江霽月

玉宇蟾輝秋展鑑  
界江水色夜磨銅  
乾坤好景誰無分  
只問靈臺得屬公

西僧禪梵

竹徑風傳西梵聲  
隔牆深夜有人聽  
山僧老去無功德  
還倚禪門誦佛經

東閣書聲

閉戶書聲午欲乾  
夜闌燈燼落蒲團  
朝廷若問觀風使

猶有書郎信長官

大橋牧笛

山花爭插滿頭紅  
蘆葉烏烏弄晚風  
橋大板平牛步穩  
老牛差後不愁儂

讀周朱二先生年譜

千年幾見南康守  
歎息人間兩譜開  
但使乾坤留一緒  
聖賢去後聖賢來

一語不遺無極老  
千言無倦考亭翁  
語道則同門路別

君從何處覓高蹤

白洋潭魚

白洋風起釣絲飛  
夢裏漁蓑此夜歸  
明日冷香橋上望  
海鷗相對便忘機

白洋潭上浩烟波  
何處漁歸此放歌  
月下聞之開口笑  
江門三尺有藤蓑

讀定山集

千首鶯花萬蠹魚  
眼昏心亂意何如  
白頭許我編摩不

活水源頭洗硯書

寄張主事


從來妙處不傳書十夢人間久不如試問十洲三島外  
白雲誰伴老仙居

贈鄒汝愚吏目時館壯哉亭

川雲嶽雨天糝糊萬里山亭此客孤又借南風吹一月  
酒葫蘆打藥葫蘆

題伍氏雙喜圖

莫怪龍鍾此葛巾穿花入竹去頻頻  
秋風酒熟南山下更與殷勤報主人



陳白沙集卷五